

## **MAVZU: TAVSIFNOMANING YOZILISH TARTIBI VA O'ZIGA XOS XUSUSIYATLARI**

### **Reja:**

1. Tavsifnoma haqida umumiy ma'lumot
2. Tavsifnomaning yozilish tartibi
3. Tavsifnomadan namunalar yozish

**Tavsifnoma** — muayyan bir shaxsning mehnat va ijtimoiy faoliyati, shuningdek, uning o'ziga xos xislat-fazilatlari va ishga yoki o'qishga qobiliyatiga rasmiy baho beruvchi hujjat.

Tavsifnoma muassasa, tashkilot, korxona yoki xo'jalik ma'muriyati tomonidan o'z xodimiga ishga (o'qishga) kirishda, xorijiy mamlakatlarga ishlash va boshqa yumushlar uchun ketayotganda, bir ishdan boshqasiga o'tayotganda, mas'ul lavozimga ko'tarilayotganda beriladi.

### **Tavsifnoma quyidagi asosiy zaruriy qismlar asosida yoziladi:**

1. Tavsiflanayotgan shaxs haqida asosiy ma'lumotlar: ismi, ota ismi va familiyasi, tug'ilgan yili, millati, partiyaviyligi, ma'lumoti, lavozimi, shuningdek, ilmiy darajasi va unvoni (agar ular mavjud bo'lsa).
2. Hujjat nomi (Tavsifnoma).
3. Matn.
4. Tavsifnoma qayerga va qanday maqsad bilan berilayapti.
5. Muassasa yoki xo'jalik rahbari, jamoat tashkilotlari, ism-familiyalari va imzolari.
6. Tavsifnoma berilgan sana.
7. Muhr.

Tavsifnoma matnida, birinchidan, shaxsning mehnat (o'qish)dagi faoliyati to'g'risida, ya'ni uning mutaxassisligi, aynan shu korxona yoki muassasada qachondan buyon ishlayotganligi (o'qiyotganligi), xizmat vazifasidagi (talabalik faoliyatidagi) o'zgarishlar va boshqalar haqida ma'lumot berilsa, ikkinchidan, uning ishga (o'qishga) munosabati, o'z mutaxassisligi, ya'ni kasbi bo'yicha mahorati, ma'naviy-siyosiy dunyoqarashi, jamoat ishlaridagi faolligi, oilaviy ahvoli, xulq-atvori, insoniy fazilatlari, xodimning qanday hukumat mukofotlariga sazovor ekanligi, ma'muriy jazolanganligi (agar jazolangan bo'lsa) qayd etiladi.

Keyin esa bayon qilinganlardan xulosa chiqariladi va tavsifnoma qanday maqsadda yoki nima uchun berilayotganligi ko'rsatiladi.

Tavsifnoma matni uchinchi shaxs (u) tilidan bayon qilinadi. Tavsifnoma, qoidaga ko'ra, muassasa yoki xo'jalik rahbari, kasaba uyushmasi tashkilotining raisi, (agar partiya a'zosi bo'lsa) partiya tashkiloti kotibi imzo chekadi va ular imzosi tashkilotning gerbli muhri bilan tasdiqlanadi.

## *Namuna*

Jahon iqtisodiyoti va diplomatiya universiteti Xalqaro huquq fakultetining  
2-kurs talabasi, 1976-yilda tug'ilgan, o'zbek, Ulug'bek Bahriddinovga

### *Tavsifnoma*

Ulug'bek Bahriddinov o'rta maktabni a'lo baholar bilan tamomlagach, 1993-yilda Jahon iqtisodiyoti va diplomatiya universitetining Xalqaro huquq fakultetiga hujjat topshirib, test sinovlaridan yuqori natijalarga erishdi va universitetning 1-kursiga talaba sifatida qabul qilindi.

O'qishga kirgan dastlabki kunlardan boshlab u o'zining qobiliyati bilan boshqa talabalardan ajralib turdi. Jamoat ishlarida faol qatnasha boshladi. Universitet "Fidoyilar klubi" a'zosi sifatida talabalar o'rtasida bir qator ma'naviy-ma'rifiy tadbirlarni amalga oshirdi. U ingliz tilini chuqur biladi, bemalol gaplasha oladi. Bu tilda ilmiy ma'ruzalar bilan xorijiy mamlakatlarda ikki marta chiqish qildi. "Mustaqil O'zbekiston Konstitutsiyasining o'ziga xos tomonlari haqida" qilgan ma'ruzasi Amerika Qo'shma Shtatlari Kaliforniya universiteti rahbariyati tomonidan munosib taqdirlandi.

U yaxshi sportchi. "Taekvando" bo'yicha bir qator olimpiadalar sovrindori.

Ulug'bek Bahriddinov o'z ustida tinmay ishlaydi, a'lochi, iqtidorli va qobiliyatli talaba sifatida universitet talabalari orasida yaxshi obro'ga ega.

U doimiy ravishda o'z malakasini, siyosiy-ma'naviy va huquqiy saviyasini oshirish ustida qat'iyat va sabr-toqat bilan ishlaydi.

U. Bahriddinov kamtarin, to'g'ri so'z, do'stlariga nisbatan g'amxo'r va mehribon.

Tavsifnoma "Mehr nuri» jamg'armasi tashkil etgan Amerika Qo'shma Shtatlari Kaliforniya universitetiga talabalikka yuborish uchun o'tkazilayotgan tanlov tashkiliy qo'mitasiga taqdim etildi.

Xalqaro huquq

fakulteti dekani

(imzo)

prof. O.Hamidov

Guruh rahbari

(imzo)

dots. SH.Saidov

(muhr)

(sana)

## *Namuna*

Kattaqo'rg'on tumaniga qarashli "Moybuloq" fermer xo'jaligi iqtisodchisi,  
1965-yilda tug'ilgan, o'zbek, O'zXDP a'zosi Abdug'ani Qo'chqorovga

### *Tavsifnoma*

Abdug'ani Qo'chqorov xizmat burchini o'tagach, 1985-yilda Samarqand qishloq xo'jalik institutining Iqtisodiyot fakultetiga o'qishga kirdi. Institutni 1990-yilda tugatib, 1990-yilning avgustidan "Moybuloq" fermer xo'jaligida avval iqtisodchi o'rinbosari, 1993-yildan hozirgi kungacha bosh iqtisodchi vazifasida ishlab kelmoqda.

Ish jarayonida A. Qo'chqorov ishchan, tashabbuskor, tartibli, halol, mehnatsevar, o'z vazifasiga ijodiy yondashadigan xodim sifatida tanildi. U iqtisodchi sifatida xo'jalik iqtisodini ko'tarishda o'zini ko'rsatib kelmoqda. Qishloq xo'jalik ishlab chiqarishini boshqarish va tashkil etish borasida o'z bilimini tinmay oshirib keladi.

Jamoat ishlarida faol ishtirok etib, doimo tashabbuskorlik qilib kelmoqda. Xo‘jalik faoliyatiga oid tadbirlarda bosh-qosh.

U doimiy ravishda o‘z malakasini, siyosiy-ma’naviy va iqtisodiy saviyasini oshirish ustida qat’iyan va sabr-toqat bilan ishlaydi.

A. Qo‘chqorov kamtarin va to‘g‘ri so‘z, do‘stlariga nisbatan doim g‘amxo‘r va mehribon. Jamoa orasida alohida hurmatga ega.

Uylangan, ikkita o‘g‘li bor.

Tavsifnoma Samarqand viloyat hokimiyati ishlar boshqarmasiga taqdim etish uchun berildi.

"Moybuloq" fermer xo‘jaligi raisi	(imzo)	D.I.Yusupov
Kasaba uyushmasi tashkiloti raisi	(imzo)	A.O.Elmonov
Bo‘lim boshlig‘i	(imzo)	K.Sayfiyev
	(muhr)	(sana)

**1-mashq.** Tavsifnomaga oid quyidagi so‘z va so‘z birikmalari daftaringizga ko‘chirib oling. Ular ishtirokida do‘stingizning faoliyatiga tavsif bering. Namunadagidek yozing.

I. Ishga munosabatini ifodalovchi sifatlar: *vijdonli, mehnatsevar, ishni o‘z vaqtida bajaradigan, tashkilotchi, tashabbuskor, ongli, siyosiy yetuk, o‘ziga va o‘rtoqlariga talabchan.*

II. Insoniy fazilatlarini ifodalovchi sifatlar: *halol, sofdil, xushmuomala, e’tiborli, kamtar, samimiy, mehribon, andishali, oljanob, g‘amxo‘r, to‘g‘ri so‘z va h.k.*

III. Salbiy baholar: *qo‘pol, dangasa, yolg‘onchi, jamoat ishlarida sust, kishilarga aralashmaydi.*

**Namuna:** *U mehnatsevar, o‘z kasbini sevadi.*

**2-mashq.** Yaqin do‘stingizga tavsifnoma yozing. Quyidagi barqarorlashgan iboralarni qo‘llang.

Qiziqarli tadbirlar tashabbuskori, yaxshi o‘rtoq, hamisha yordam berishga tayyor, o‘rtoqlari fikrini eshita biladi, ishga chin dildan munosabatda bo‘luvchi, ma’naviy yetuk, sport bilan shug‘ullanadi, talabalar o‘rtasida obro‘ga ega.

**3-mashq.** Quyidagi gaplarni tugallang.

1. Ozoda Jalolovna Bahriddinova 1973-yilda ... 2. 1990-yilda o‘rta maktabni tugatib, ... o‘qishga kirdi. 3. Hozirgi kunda ... o‘qiydi. 4. O‘qish davrida u o‘zini ... talaba sifatida ko‘rsatdi. 5. Tavsifnoma ... taqdim etish uchun berildi. 6. A‘lo o‘qiganligi uchun... 7. ... vazifasida ishlab kelmoqda. 8. U institutning jamoat ishlarida...

**4-mashq.** Quyidagi gaplarni matn talabiga asosan joylashtiring, zarur o‘rinlarni to‘ldirib, daftaringizga ko‘chiring.

1. Fakultet va institut jamoat ishlarida faol ishtirok etganligi uchun institut rahbariyatining faxriy yorlig‘i bilan mukofotlanadi. 2. Tavsifnoma. 3. Hoshimova Munojot Tursunboyevna 1989-yilda Samarqand davlat universitetining Yuridik fakultetiga o‘qishga kirdi. 4. Tavsifnoma jamg‘arma ma’muriyatiga taqdim etish uchun berildi. 5. Hozirgi kunda O‘rta Chirchiq tuman prokuraturasida tergovchi vazifasida ishlamoqda. 6. Samarqand davlat universiteti Yuridik fakultetining 1-kurs talabasi, 1972-yilda tug‘ilgan, o‘zbek, Hoshimova Munojot Tursunboyevna...

